

Kingusinaartumik akiliisoqartillugu eqqartuussivik avaqqullugu akiliisitsiniarnermi aningaasartuutit pillugit Kalaallit Nunaannut nalunaarut

Kingusinaartumik akiliisoqartillugu erniat il.il. pillugit inatsimmi § 9 a, imm. 3 naapertorlugu, tak. inatsimmut nalunaarut nr. 743 4. september 2002-meersoq, tak. peqqussut nr. 991, 14. Oktober 2011-meersoq matumuuna makkua Kalaallit Nunaanni atuuttussanngorlugit aalajangersarneqarput.

§ 1. Nalunaarummi matumani malittarisassat atuupput pisuussutaateqarnermut inatsisinut tunngassuteqartuni piumasaqaatinik eqqartuussivik avaqqullugu akiliisitsiniarnermi.

§ 2. Allakkatigut akileeqqussutinik pisassarisanut tunngasunik nassiussisoqartillugu aamma pisassalik sinnerlugu allamik akiliisitsiniartitsisoqartillugu pisassalik akileeqqusisinnaavoq ernialiisarnermik inatsimmi § 9 b-mi malittarisassat malillugit.

Imm. 2. Akiliisitsiniarnissamat iliuuseqaqqinnertut, tak. ernialiisarnermik inatsimmi § 9 a, pisassalik piumasaqarsinnaavoq aningaasartuutini naleqquttut tulluartullu akiligassallip akilissagai malittarisassat §§ 3 aamma 4-mittut naapertorlugit, akiliinissamat kinguaattoorneq akiitsullip atugarisaanik pissuteqanngippat. Pisassalik malittarisassat § 3 aamma § 4-miittut malillugit akileeqqusisinnaavoq, piumasaqaatit aalajangersakkani tamani taakkunaniittut naammassineqarsimappata.

§ 3. Pisassallip alla nammineq sinnerluni pisassaminik akiliisitsiniartissimappagu, pisassallip akissarsiassat tulluartut taamaaliornermut attuumassuteqartut akiitsulimmut akileeqqusinnaavai. Taamaallaalli taamaattoqarsinnaavoq tamanna sioqqullugu allakkatigut akileeqqussummik akiitsulimmut nassiussisoqarsimappat, oqaatigineqarsimassalluni allakkatigut akileeqqussutip nassiunneqarneraniit ikinnerpaamik ullunik qulinik piffissarititaq sioqqullugu akiliinngitsoorneq akiliisitsiniarnermi aningaasartuutininik suli allanik akiligassiinermik kinguneqarsinnaasoq, aammalu akiliisitsiniartartup pineqartup pisassarisanik akiliisitsiniarnissaa pisariaqarsimasoq.

Imm.2. Akileeqqusat imm. 1-imi, oqaaseqatigiinni siullerni eqqaaneqartut nalunaarummi ilanngussaq 1-imi aalajangerneqarsimasuniit amerlanerusinnaanngillat.

§ 4. Pisassalik pisassaminik nammineerluni akiliisitsiniarsimaguni, akilersuinissaq pillugu akiitsulimmik isumaqatigiissuteqarnerminut isumaqatigiissutillu suliarineranut tamatumalu allaffissornikkut aqunneqarneranut aningaasartuutininik tulluartunik akileeqqusisinnaavoq (eqqartuussutitaqanngitsumik isumaqatigiissut). Taamaallaalli taamaattoqassaaq tamanna sioqqullugu akiligassaqartumut allakkatigut akileeqqussummik nassiussisoqarsimappat nalunaarutigineqarsimalluni, allakkatigut akileeqqussutip nassiunneqarneraniit ikinnerpaamik ullunik qulinik piffissarititaq sioqqullugu akiliinngitsoorneq akiliisitsiniarnermi aningaasartuutininik suli allanik akiligassiinermik kinguneqarsinnaasoq, aammalu akiliisitsiniartartup pineqartup pisassarisanik akiliisitsiniarnissaa pisariaqarsimasoq.

Imm. 2. Akileqqusat imm. 1-imi, oqaaseqatigiinni siullerni eqqaaneqartut nalunaarummi ilanngussaq 2-mi aalajangerneqarsimasuniit amerlanerusinnaanngillat.

§ 5. Isumaqatigiissut imaluunniit niuernermit ileqqusartuq imaluunniit ileqqusartuq alla aqqutigalugu malittarisassat §§ 3 aamma 4-miittut sanioqqunneqarsinnaanngillat pisassalimmut ajoqutaasussanngorlugit, tamanna piumasaqaatinik eqqartuussivik avaqqullugu akiliisitsiniarnermut aningaasartuutunik naleqquttunik tulluurtunillu pisassallip akileeqqusisinnaannginneranik kinguneqassappat. Pisassarissat isumaqatigiissut, ernialiisanermik inatsimmi § 7, imm. 1-mi taaneqartut ittoq, naapertorlugu pisassarineqarpata, malittarisassat §§ 3 aamma 4-miittut aamma saneqqunneqarsinnaanngillat, isumaqatigiissummik imaluunniit niuernermit ileqqusartumik imaluunniit ileqqusartumik allamik atuinikkut.

§ 6. Nalunaarut atuutilersinneqarpoq ulloq 1. november 2011 aamma atuutissaq akiliisitsiniarnermit aningaasartuutitut, tamatumani akileeqqusissut pineqartuq nalunaarutip atuutilersinneqarnerata kingorna pilersimassaaq.

Justitministereqarfik, ulloq 14.oktober 2011

MORTEN BØDSKOV

/ Joachim Kromann

Alla aqquutigalugu eqqartuussivik avaqqullugu akiliisitsiniarneq (akiliisitsiniartarfiit)

Pisassanik eqqartuussivik avaqqullugu akiliisitsiniarneq allamit ingerlanneqartillugu (assersuutigalugu suliffeqarfik akiliisitsiniartarfik imaluunniit eqqartuussissuserisoq) akissarsiasat tulluurtut taamaaliornermut attuumassuteqartut pisassaqtup akiitsulimmut akileqqusinnaavai, nalunaarummi § 3, imm. 1 naapertorlugu.

Taamaattoq pisassallip *annerpaamik* piumasarisinnaavaa, akiitsulik piumasaqaammut ataatsimut akiliissasoq akiliisitsiniarnermi akiliusiussanik imaattunik:

Pisassarifat annertussusaat	Akiliisitsiniarnermi akiliut (akitsuuseqqiut (moms)ilanngunnagu, tak. ataaniittoq)
0 – 1.000 kr.	350 kr.
1.001 – 2.500 kr.	600 kr.
2.501 - 5.000 kr.	850 kr.
5.001 – 10.000 kr.	1.100 kr.
10.001 – 25.000 kr.	1.450 kr.
25.001 – 50.000 kr.	1.950 kr.
50.001 – 100.000 kr.	2.450 kr.
100.001 – 250.000 kr.	3.300 kr.
250.001 – 500.000 kr.	5.500 kr.
500.001 -	5.500 kr. + 1% pisassat ilaannut 500.000 kr.-init amerlanerusunut

”Pisassaq” pineqartillugu tamanna ima paasineqassaaq taanna tassaasoq piumasaqaat pingaarneq (akitsuuseqqiut (moms) ilanngullugu) ernialiissutit ulloq akiliiffissaq kingulleq sioqqullugu ernialersuutigineqartut ilanngullugit, kisianni ullup akiliiffissap kingorna erniat (kingusinaartumik akiliinermi erniat) ilanngunnagit. Taamatuttaaq ilanngullugit naatsorsuunneqassapput allaffissornermut akiliusiussat aamma akiliusiussat allat, pisassallip isumaqatigiissut naapertorlugu akiligassalimmit ulloq akiliiffissaq kingulleq sioqqullugu akileqqusinnaasai, tassa imaappoq akiligassallip akiliisussaanerminik sumiginnaasinnaanera sioqqullugu.

Aningaasat akiliisitsiniarnikkut akileqquneqartut taamaallaat akitsuuseqqiuserneqarsinnaapput (moms), pisassalik akitsuuseqqiussisinnaanermut (moms) nalunaarsorneqarsimangippat.

Pisassallip nammineerluni eqqartuussivik avaqqullugu akiliisitsiniarnera (nammineq akiliisitsiniarneq)

Pisassanik eqqartuussivik avaqqullugu akiliisitsiniarneq pisassaqtumit namminermit isumagineqarpat, pisassaqartoq piumasaqarsinnaavoq akiitsullip akilersuinissamik isumaqatigiissusiorfigineqarneranut aamma isumaqatigiissutip sananeqarneranut (eqqartuussutitaqanngitsumik isumaqatigiissut) aamma tamatuma allaffissornikkut aqunneqarneranut aningaasartuutinik naleqquttunik akiliisoqassasoq, nalunaarummi § 4, imm. 1 naapertorlugu

Taamaattoq pisassallip *annerpaamik* piumasarisinnaavaa, akiitsulik piumasaqaammut ataatsimut akiliissasoq akiliisitsiniarnermi akiliusiussanik imaattunik:

Pisassarifat annertussusaat	Akiliisitsiniarnermi akiliut (akitsuuseqqiut (moms)ilanngunnagu)
0 – 1.000 kr.	250 kr.
1.001 – 2.500 kr.	450 kr.
2.501 - 5.000 kr.	550 kr.
5.001 – 10.000 kr.	750 kr.
10.001 – 25.000 kr.	1.000 kr.
25.001 – 50.000 kr.	1.200 kr.
50.001 – 100.000 kr.	1.600 kr.
100.001 – 250.000 kr.	2.300 kr.
250.001 – 500.000 kr.	3.650 kr.
500.001 -	3.650 kr. + 1% pisassat ilaannut 500.000 kr.-init amerlanerusunut

”Pisassaq” pineqartillugu tamanna ima paasineqassaaq taanna tassaasoq piumasaqaat pingaarneq (akitsuuseqqiut (moms) ilanngullugu) ernialiissutit ulloq akiliiffissaq kingulleq sioqqullugu ernialersuutigineqartut ilanngullugit, kisianni ullup akiliiffissap kingorna erniat (kingusinaartumik akiliinermi erniat) ilanngunnagit. Taamatuttaaq ilanngullugit naatsorsuunneqassapput allaffissornermut akiliusiussat aamma akiliusiussat allat, pisassallip isumaqatigiissut naapertorlugu akiligassalimmit ulloq akiliiffissaq kingulleq sioqqullugu akileqqusinnaasai, tassa imaappoq akiligassallip akiliisussaanerminik sumiginnaasinnaanera sioqqullugu.

Aningaasanut akiliisitsiniarnikkut akileqquneqartunut akitsuuseqqiunneqarsinnaasut (moms) ilaapput.